



Bosnia and Herzegovina  
Federation of Bosnia and Herzegovina

**CANTON SARAJEVO**  
**Canton Development Institute**

Na osnovu člana 66. stav 2. Zakona o organizaciji uprave u Federaciji Bosne i Hercegovine („Službene novine FBiH“ broj 35/05), Direktor Zavoda za izgradnju Kantona Sarajevo donosi:

**PRAVILNIK**  
**O KORIŠTENJU MOBILNIH I FIKSNIH TELEFONA U SLUŽBENE SVRHE U**  
**ZAVODU ZA IZGRADNJU KANTONA SARAJEVO**

**Član 1.**  
**(Predmet Pravilnika)**

Ovim Pravilnikom utvrđuje se pravo na korištenje službenih mobilnih telefona ili privatnih mobilnih telefona u službene svrhe (u daljem tekstu: mobilni telefoni), fiksnih telefona direktnih linija, instaliranih u zgradama Zavoda za izgradnju Kantona Sarajevo (u daljem tekstu: Zavod), maksimalni mjesečni i godišnji iznosi troškova koji se priznaju određenim kategorijama zaposlenika a plaćaju se na teret budžeta Zavoda, kao i postupak i način plaćanja tih troškova preko dozvoljenog iznosa.

**Član 2.**  
**(Definisanje pojmova)**

- (1) Mobilnim telefonima, u smislu ovog Pravilnika, smatraju se svi mobilni telefonski aparati u vlasništvu Zavoda, kao i svi mobilni telefonski aparati u vlasništvu zaposlenika Zavoda, sa pripadajućom karticom/pretplatničkim brojem a za koje troškove korištenja snosi Zavod, u skladu sa ovim Pravilnikom.
- (2) Službenim fiksnim telefonima, u smislu ovog Pravilnika, smatraju se svi brojevi fiksne telefonije po pojedinačnim linijama i linijama sa centrale a koji se koriste u Zavodu.

**Član 3.**  
**(Utvrđivanje prava na korištenje mobilnih telefona)**

- (1) Pravo na korištenje mobilnog telefona ima Direktor Zavoda za izgradnju Kantona Sarajevo (u daljem tekstu: Direktor).
- (2) Pravo na korištenje mobilnih telefona imaju državni službenici i namještenici, kojima Direktor posebnom odlukom dodjeli na korištenje službeni telefon.
- (3) Licima iz stava 2. ovog člana Direktor može uručiti službeni mobilni telefon, te im odobriti pretplatnički broj ili ultra karticu, koje će koristiti na službenom ili vlastitiom mobilnom uređaju.
- (4) Prilikom preuzimanja mobilnog uređaja korisnik je dužan potpisati izjavu o preuzimanju istog, te saglasnost da će nakon prestanka radnog odnosa u Zavodu, prelasku na drugo radno mjesto ili drugog





Bosnia and Herzegovina  
Federation of Bosnia and Herzegovina

**CANTON SARAJEVO**  
**Canton Development Institute**

pravnog osnova za korištenja uređaja, isti vratiti ili platiti knjigovodstvenu vrijednost mobilnog uređaja, ukoliko je došlo do otuđenja, gubitka ili oštećenja istog.

(5) Obrazac izjave iz stava 4. ovog člana je sastavni dio ovog Pravilnika (Obrazac 1. – Izjava).

(6) Zaposlenik iz stava 2. ovog člana, koji se nalazi na porodiljskom odsustvu, neplaćenom odsustvu sa rada ili mu je izrečena mjera prestanka radnog odnosa, zbog teže povrede radne obaveze, nema pravo na korištenje mobilnog telefona.

(7) Zaposlenicima iz stava 2. ovog člana, koji su bili odsutni sa posla cijeli mjesec zbog bolovanja, korištenja godišnjeg odmora i slično, neće se priznati pravo na troškove mobilnog telefona.

**Član 4.**

**(Troškovi korištenja službenih mobilnih telefona)**

(1) Mjesečni i godišnji troškovi korištenja mobilnih telefona koji se plaćaju na teret budžeta Zavoda, utvrđuju se u maksimalnom mjesečnom i godišnjem iznosu kako slijedi:

Naziv radnog mjesta	Mjesečni iznos	Godišnji iznos
• Direktor.....	70,00 KM.....	840,00 KM
• Pomoćnik Direktora.....	50,00 KM.....	600,00 KM
• Šef službe.....	40,00 KM.....	360,00 KM
• Državni službenici koji obavljaju stručni nadzor.....	40,00 KM.....	360,00 KM
• Državni službenici.....	20,00 KM.....	240,00 KM
• Namještenici.....	10,00 KM.....	120,00 KM

(2) Visina sredstava iz prethodnog stava uključuje PDV.

**Član 5.**

**(Troškovi korištenja službenih fiksnih telefona)**

(1) Mjesečni i godišnji troškovi korištenja fiksnih telefona-direktnih linija utvrđuju se u iznosima kako slijedi:

Naziv radnog mjesta	Mjesečni iznos	Godišnji iznos
• Direktor.....	150,00 KM.....	1.800,00 KM
• Pomoćnik Direktora.....	50,00 KM.....	600,00 KM
• Šef službe.....	50,00 KM.....	600,00 KM
• Državni službenici.....	20,00 KM.....	240,00 KM
• Namještenici.....	10,00 KM.....	120,00 KM





Bosnia and Herzegovina  
Federation of Bosnia and Herzegovina

**CANTON SARAJEVO**  
Canton Development Institute

- (2) Troškovi iz prethodnog stava uključuju troškove pretplate i PDV-a.
- (3) Ukoliko dođe do promjene tarifnog sistema i cijena davaoca usluga fiksnih telefona, u istom omjeru će se mijenjati i ograničenje troškova po zaposleniku.

#### **Član 6.**

##### **(Odgovornost u korištenju mobilnih i fiksnih telefona)**

- (1) U slučaju većih odstupanja troškova fiksnih telefona utvrđenih članom 5. ovog Pravilnika, Direktor će naložiti da se zatraži listing od BH Telecoma u digitalnoj formi, te će se na taj način utvrditi pojedinačna prekoračenja odobrenih iznosa zaposlenika.
- (2) Zaposleniku kojem je ovim Pravilnikom odobreno korištenje mobilnog telefona, dužan je dati izjavu da je saglasan da mu se, u slučaju prekoračenja dozvoljenog iznosa, više potrošeni iznos naplati obustavom na platu.
- (3) Troškove korištenja telefona iznad odobrenog iznosa podmiruje zaposlenik-korisnik telefona pri obračunu prve sljedeće plate, nakon dostave mjesečnog računa.
- (4) U slučaju prekoračenja odobrenog iznosa mjesečnog telefonskog troška, utvrđenog članovima 4. i 5. ovog Pravilnika, izvršit će se obustavljanje od plate korisnika telefona, o čemu će se donijeti pojedinačno rješenje.
- (5) Rješenje iz predhodnog stava ovog člana donosi Direktor.
- (6) Odredba 4. ovog člana ne odnosi se na Direktora, u slučaju da je, izuzetno, prekoračenje odobrenog iznosa za korištenje telefona nastalo iz opravdanih razloga, o čemu Direktor sačinjava službenu zabilješku u kojoj se konstatuju razlozi koji su uticali na povećanje troškova.
- (7) Obrazac izjave iz stava 2. ovog člana sastavni je dio ovog Pravilnika (Obrazac 2. – Izjava).

#### **Član 7.**

##### **(Stupanje na snagu)**

- (1) Ovaj Pravilnik stupa na snagu danom donošenja.
- (2) Stupanjem na snagu ovog Pravilnika, stavlja se van snage Pravilnik broj: 05-068-383/18 od 19.04.2018. godine.

Broj: 05-45-9216/21

Datum: 01.10.2021. godine



**Belma Barlov, dipl. ing. arh.**



e-mail: [zik@zik.ks.gov.ba](mailto:zik@zik.ks.gov.ba), <http://zik.ks.gov.ba>  
Tel: + 387 (0) 33 254-900, + 387 (0) 33 254-945,  
+ 387 (0) 33 254-921  
Fax: + 387 (0) 33 226-523  
Sarajevo, Kaptol 3